

Veteran Umno Akan Diberi Kursus Penggunaan Media Alternatif - Rais Yatim Bernama
17 Mac, 2012

JELI, 17 Mac (Bernama) -- Kementerian Penerangan Komunikasi dan Kebudayaan bercadang menganjurkan kursus dan latihan berkaitan penggunaan internet dan media alternatif kepada anggota veteran Umno, kata Menteri Datuk Seri Dr Rais Yatim.

Beliau berkata kursus dan latihan itu penting supaya anggota veteran Umno yang masih "bertenaga" dapat memberi sumbangan serta tidak ketinggalan dalam era perkembangan pesat alam maya ini.

Katanya kursus itu tidak terlalu berat tetapi memadai bagi veteran Umno menyesuaikan diri dengan perubahan yang berlaku dalam bidang tersebut dan memanfaatkan teknologi moden seperti internet dan media alternatif termasuk Facebook.

"Kita ketahui perkembangan di alam maya adalah terlalu banyak dan meluas, sekiranya seseorang individu yang masih bertenaga tidak mempunyai latar belakang dan asuhan yang sederhana, maka kita akan ketinggalan," katanya kepada pemberita selepas merasmikan Konvensyen Penghayatan 1Malaysia di Pusat Dakwah, di sini hari ini.

Turut hadir pada konvensyen ialah anggota Majlis Bekas-bekas Wakil Rakyat (Mubarak) dan Veteran Umno Kelantan, Menteri Perdagangan Antarabangsa dan Industri yang juga anggota Parlimen Jeli Datuk Seri Mustapa Mohamed dan Presiden Mubarak Datuk Seri Abdul Aziz Abdul Rahman.

Rais berkata golongan muda lebih gemar menggunakan media alternatif untuk berkomunikasi dan pengetahuan menggunakan media alternatif oleh veteran Umno akan menjadi kelebihan untuk mereka mendekati golongan muda.

Pada masa yang sama, beliau turut meminta anggota Mubarak yang mempunyai banyak pengalaman sama ada dalam kerajaan atau parti, membantu Barisan Nasional (BN) memenangi pilihan raya umum ke-13 akan datang, termasuk merampas kembali Kelantan daripada PAS.

Beliau berkata berdasarkan kepada "mood" rakyat Kelantan, mereka kini mahukan perubahan berlaku di negeri ini dan kerajaan BN pula mahukan rakyat memberi mandat kepada mereka agar perubahan yang diinginkan itu dapat dilaksanakan.

Sementara itu, Mustapa yang juga Pengerusi Badan Perhubungan Umno Kelantan, berkata beliau amat menghargai sumbangan daripada anggota Mubarak dan veteran Umno bagi membantu BN memenangi pilihan raya umum akan datang.

Beliau berkata pemimpin muda masih memerlukan bimbingan daripada pemimpin veteran yang banyak pengalaman untuk membawa lebih kecemerlangan dalam pembangunan di Kelantan.

--BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=652900>